



FACTVM,

Pour Maistre Guillaume Carbonnel, Docteur en Theologie, Chanoine & Archidiacre en l'Eglise Cathedrale de Cahors, deffendeur.

Contre Maistres Louis Germain, Clerc du Diocese de Paris, & Anthoine de Vertamon, Archidiacre en l'Eglise de Paris, demandeurs.



L s'agist du possessoire de la Chanoinie & Archidiaconé en l'Eglise de Cahors, dont le deffendeur a esté pourueu par la resignation faite en sa faueur, par deffunct Maistre Anthoine Carbonnel son oncle, dernier Titulaire & paisible possesseur par procuration du 29. Mars 1627. admise en Cour de Rome le 29. Aupil *cum decreto*, que le deffendeur se demettroit de de la Cure de Fraissé ou de Causade dont il estoit pourueu, dās deux mois autrement, tant ladite Cure, que la Prebende, & l'Archidiaconé vacqueroient de plain droit.

Sur ceste signature qui est expediee *in forma dignum*, le deffendeur a obtenu le visa de Monsieur l'Euesque de Cahors le 9. Nouembre de la mesme année, a pris possession le 15. & le lendemain 16. dudit mois, il a esté instalé en plain Chapitre deux iours après, sçauoir le 18. du mesme mois, est suruenue le deceds dudit Maistre Anthoine de Carbonnel, ainsi qu'il appert par l'extraict tiré du liure des Mortuaires de ladite Eglise de Cahors: De maniere qu'il faut que ce poinct demeure pour constant, que le deffendeur a esté pourueu & pris possession solemnelle, du viuant de son resignant, en consequence dequoy on ne peut pas dire que lesdits benefices ayent vaqué par mort.

Et neantmoins les deux demandeurs sont pourueus desdits

Benefices *per obitum*, dudit Maistre Anthoine de Carbonnel, sçauoir, Maistre Louis Germain en Regale, & Maistre Anthoine de Vertamon, comme tenant l'indult de Monsieur Lescallier Conseiller au Parlement de Paris.

Ils opposent d'abord, que la procuration du deffendeur n'a esté enuoyée à Rome que neuf iours auant le *concessum* de ladite prouision & signature, & partant n'y pouuoit estre lors de l'expedition d'icelle, ce qui induit que c'est vne petite datte.

A quoy le deffendeur respond en premier lieu, que ladite procuration a esté passée pardeuant Notaire, expédiée donnée & deliurée au Banquier vn mois entier, auparauant ledit *concessum*, & partant, on ne peut pas dire qu'il y ayt aucune faute de la part du Resignant, ny du Resignataire.

En second lieu, que ladite signature a demeuré vn mois entier à Rome, après le *concessum*, comme le *missa*, qui est du premier Iuin en fait foy, lequel *missa*, est cinq mois entiers auparavant le deceds du Resignant, du viuant duquel le deffendeur a pris possession réelle en personne comme dit est, & cōsequemment n'ayant que les Benefices vaccans par mort qui soient affectez aux Indultaires, ceux dont est question, ne pouuoient estre pretendus par ledit Maistre Anthoine de Vertamon en vertu de son indult, joint l'incompatibilité notoire d'entre lesdits Benefices, & celuy dont il est pourueu & paisible possesseur, sçauoir d'Archidiacre en l'Eglise de Paris.

Quand à Maistre Louis Germain, qui est le Regaliste pourueu le 13. Feurier 1630. il fonde son droit sur ce qu'il pretend que lors de la resignation faite par ledit Anthoine de Carbonnel, en faueur du deffendeur, il y auroit ouuerture de Regale en l'Euesché de Cahors: en consequence dequoy ladite resignation n'a peu ny deu estre faite entre les mains du Pape, qui ne peut en quelque façon que ce soit, toucher aux Benefices qui vacquent pendant la Regale.

Le deffendeur respond en premier lieu, que Mes^{re} Pierre Habert, auoit esté donné pour Coadiuteur à Messire Simon Estienne de Popejean son predecesseur Euesque, pris possession de l'Euesché de son viuant, presté en personne le serment de fidelité au Roy, & payé les droits deus aux Tresoriers des Offrandes

de sa Majesté, dès le 25. Avril 1625. ainsi qu'il appert par le certificat de Monsieur Cardinal de la Rochefoucault, Grand Aumônier de France, duquel iour quand bien la Regale auroit lieu en l'Euesché de Cahors, (que non,) comme il sera monstré presentement, elle auroit esté close, n'estant point necessaire pour la closture de la Regale, que l'Euesque fasse enregistrer son serment de fidelité en la Chambre des Comptes, & obtenu main-leuée des fruiçts, notamment quand il n'y a point eu de faisie du temporel de son Euesché, comme il est constant dans le faict, que le temporel dudit Euesché de Cahors, n'a point esté saisy: Cette formalité de l'enregistrement du serment de fidelité en la Chambre des Comptes, n'estant necessaire que pour la main-leuée des fruiçts, & la descharge de l'Oeconomie ou Commissaire estably au temporel, qui consiste aux fruiçts de l'Euesché, & non pour ce qui regarde le spirituel, ainsi qu'il a esté iugé par l'Arrest du Parlement du 11. Avril 1628. en la cause de la Penitencerie d'Angers.

Et de faict, l'on ne scauroit monstrer que iusques à present, aucun Euesque de Cahors ny des autres Eueschez de Languedoc, ayt iamais fait enregistrer son serment de fidelité en la Chambre, ny obtenu main-leuée des fruiçts.

En second lieu, le deffendeur soustient absolument que le droict de Regale n'a point de lieu, & n'a iamais esté practiqué iusques à present en la Prouince de Languedoc, & particulièrement en l'Euesché de Cahors qui en est exempt, ainsi qu'il appert par l'extraict tiré du Registre de la Chambre des Comptes, rapporté par Messieurs le Maistre Ruzæus & Probus, aux traictez qu'ils ont faits, & iusques à present il ne se trouuera point qu'aucun Regaliste ayt impetré & obtenu le moindre Benefice du Dioceze de Cahors, de sorte que quand bien il plairoit au Roy y establir ledit droict, ce ne pourroit estre que pour l'aduenir & non point pour le passé.

Ce qui est preiugé par l'Arrest du 28. Aoust 1631. par lequel sur le Reglement des Iuges d'entre le Parlement & le grand Conseil, le Roy a retenu en son Conseil la cognoissance du differend des parties & ordonné, qu'icelles parties escriroient & produiroient au principal.

4

En suite dequoy, lesdites productions furent deuëment examinées par messieurs les maistres des Requestes & rapporté par Monsieur le Marle sieur de Beaubourg, pardeuant Monsieur le Garde des Seaux de Chasteauneuf, le 22. Ianuier 1632. dans la ville de Mets, où il fut commandé aux parties se retirer, & laisser le deffendeur dans la possession & iouïssance desdits Benefices.

Le deffendeur est plein de vertu & de merite, Docteur en Theologie, qui a presché 17. ans entiers dans la Prouince pendant les Aduents & Caresmes, qui ne possède aucun Benefice que ceux dont est question, desquels a esté bien & canoniquement pourueu par la resignation faite en sa faueur, par ledit deffunct Maistre Anthoine de Carbonnel son oncle, admise en Cour de Rome, & pleinement effectuée de son viuant.

Partant il conclud, à ce qu'il soit dit qu'il sera maintenu & gardé en la possession & iouïssance de ladite Prebende & Archidiaconé, avec adiudication de despens, dommages & interests.

Monsieur le Maistre, sieur de Bellejambe Rapport